

Philosophis, Microcosmus, oder die kleine Welt genennet wird/ welchen Gott aus der Erden geschaffen/ eine vernünfftige Seele darein gepflantzet/ mit einem herrlichen ingenio gekrönet/ vnnd jhme alle andere Thieren/ vnd Creaturen des gantzen Erdenkreisses Vnterthan gemacht hat/ daß er wie ein kleiner Gott über sie herrsche vnd regiere; Vnd an vielen andern Stücken mehr/ welche nicht alle zu erzehlen seynd/ als in einem klaren Spiegel gnugsam erzeiget; So erscheinen dennoch diese Eygenschafften Gottes/ eben so wol an den vegetabilien oder Erdengewächsen/ als an den vorerwehnten Dingen. Dann wann wir erstlich betrachten wollen/ wie Gott im Anfang durch sein Wort einmahl gesprochen/ daß so viele vnd mancherley/ ja vnzehlbarhe arten von Graß/ Kreutern/ Pflantzen/ Stauden vnd Bäumen (welche nicht allein an jhrem eusserlichen Wesen/ Gestalten/ Farben/ Signaturen, vnd grösse jhrer Wurtzeln/ Stämmen/ Blettern/ Blumen/ Früchten/ vnd anderer Theilen/ sondern die auch in jhren jinnerlichen Substantzen/ vnnd fürnemblich in jhren qualitibus manifestis, primis & secundis, besondern eingepflantzten Eygenschafften/ so die Medici qualitates tertias nennen/ Tugenden/ vnd Wirkungen von einander vnterschieden seynd) auß der vnansehnlichen vnd vngestalten Erden haben herfür gehen vnd brechen müssen; Wie auch darbey/ was gestalt der ewige Schöpffer dieser Dingen/ jhren besondern Samen gegeben/ wordurch ein jegliches nach seiner Art/ wann es abgeheth/ sich auff new propagiren, vermehren/ vnd im Wesen erhalten möge/ solang als die Welt stehen wird. An welchen Samen wir dann auch ein starckes subject der verwunderung haben/ in deme dieselbigen/ vnangesehen sie so klein/ gering/ schlecht vnd vnformlich/ als sie vns für den augen düncken mögen/ dennoch gleichwol die gantze Form jhrer Gewächsen/ potentialiter, vnd so mysteriosè in sich verborgen haben/ daß/ wann dieselbigen entweder in die Erde von der Natur/ oder durch Menschen Hände verscharrret werden; sie sich wenig bey wenig eröffnen/ vnterwerts vnnd vmb sich jhre Wurtzeln (welche gleichsam jhre erste Brusten seynd/ die da von dem aliment, daß sie aus der Erden bekommen/ jhr Gewächse/ so zusagen/ säugen/ ernehren vnd erhalten/ vnd darnach müssen sie als ein fundament seyn/ auff daß sie wider die Gewalt der Winden/ vnd Vngewitter fest stehen mögen) setzen/ darnach über sich herfür kriechen/ die Erde spalten/ offnen Lufft suchen/ Schößlein gewinnen/ vnd endlich zu jhrem vollnkommenen Stand gelangen/ wie an einem KürbisSamen/ welcher eine kleine Hütte oder Häußlein mit breiten grünen Blettern bedecken/ vnd mit vnterschiedlichen grossen vnd schweren Früchten beladen kan; Oder an einer kleinen Eychel/ darauß (mit deren darzu gehörigen Zeit) so ein mechtiger/ grosser/ starcker/ vnd von Holtz fester Baum erwachsen/ vnd wie etliche meinen/ etliche hundert Jahre/ wider alle Stürme vnd Vngewitter/ im Leben bleiben kan; Jch will geschweigen die Exempel so vieler anderer Samen der vegetabilien nach jhrer Art/ die sich stetigs für aller Menschen Augen darthun vnd erzeigen. So haben wir ja ein eusserlichs Fürbild/ vnd gnugsamen Augenschein/ woran wir die Allmacht vnd vndendliche Weißheit des Allerhöchsten spüren vnd sehen mögen.

Darnach wann wir kommen die fürtreffliche/ schöne/ zierliche/ vnd prächtige anmutige præsentz der obgemelten Dingen in gemein/ als da seynd/ das